

## Kiko ta Bon? Kiko ta Malu?

Hende tin diferente kontesta pa e preguntanan aki. Awendia hopi hende ta kontestá ku bon i malu ta relativo. Den otro palabra, loke bo ta haña ta bon, esei ta bon; i malu ta loke bo ta haña ta malu. I kisas loke abo ta haña ta bon, ami ta haña ta malu; òf viseversa.

Si leinan di nos pais tabata basá riba e filosofia di relatividad, lo tin un tutu formal den nos komunidad. Suponé ku un hòmer abiertamente a drenta bo kas I kue fl. 300. Bo ta rabiá ku el a hasi malu. Ma e no ta haña ku el a hasi malu i ta nenga duna e sèn bèk. Bo ta yama polis. E agente polisial tambe ta haña ku e hòmer a hasi malu, ma ta mustra ku esei ta su **opinion personal**. E no por arest'é, pasobra segun e lei di relatividad, e por enkarselá solamente hende ku ta **kere** ku nan a hasi malu. Lei ta bisa solamente ku loke bo ta **haña** ta bon, ta bon; i malu, ta loke bo ta **haña** ta malu. Klaramente ningun komunidad por funshoná ku e filosofia absurdo di relatividad.

Otro hende ta bisa ku ningun regla **universal** di bon i malu ta eksistí. Den otro palabra, reglanan di bon i malu por eksistí, pero ningun regla ta válido den tur kaso tur ora.

Pues, segun e étika aki kisas ta malu pa gaña den mayoria kaso. Ma por tin tempu ku ta bon pa gaña; por ehèmpel ora un mentira lo resultá den mas tantu bon ku si bo a papia bèrdad. Segun e filosofia aki, **abo** ta esun ku tin ku disidí ki tempu mas tantu bon lo resultá.

Doño di bo trabou ta ripará ku e debébo un suma supstansial. Ma e ta gañábo pasobra e ke e sèn pa ekspandé su kompania. E ta di opinion ku lo benefisi'é mas tantu pa no dunábo e suma ku bo tin derechu riba dje. E ta rasoná ku ekspanshon di su kompania lo benefisiá su empleadonan tambe. Pues, mas bon lo resultá si e keda ku bo sèn. Segun e, el a hasi bon. Ma segun abo awor...? Ningun di nos lo ke biba na un pais unda kada ken ku ta por disidí ki tempu mas tantu bon lo resultá.

Un otro kontesta ku algun hende ta duna pa e pregunta “Kiko ta bon i kiko ta malu?” ta ku tin ún (1) regla so ku ta determiná loke ta bon òf malu. Mayoria di esnan ku ta sigui e filosofia aki ta haña ku e 1 regla ei ta amor. Pues, loke ta determiná kiko ta bon òf malu ta, si bo ta aktua ku stimashon.

Ma lo tin problema serio si leinan di nos komunidad ta basá riba e filosofia aki. Un hoben ta gusta un mucha muhé atraktivo. Ma e yùfrou no ke mir'é, ni pintá. E yònkuman ta buska tur manera pa gan'é sin eksito. Un dia e ta violá e mucha muhé. Polis ta arestá e yònkuman. Ma e hóben ta insistí ku motibu ku el a rep e ta pasobra e ta stim'é. Si nos leinan ta basá riba e étika ku stimashon so ta loke ta determiná kiko ta bon i kiko ta malu, mester duna e yònkuman su libertat. Mas lokura!

Nos ta biba den un era ku hopi hende ta “*yama loke ta malu, bon, i loke ta bon, malu*” (Isaias 5:20). Nan ke ta liber pa hasi loke nan ta haña ta bon. Ma echu ta ku ningun komunidad por sobreviví sin **leinan independiente ku no ta varia a base di sintimentu òf opinion personal**.

Dios Su reglanan na nèt esei! “*Lei di Señor ta perfekto...e preseptonan di Señor ta korekto...e mandamentunan di Señor ta puru...*” (Salmo 19:7-8). Dios a krea hende, i sa kon hende por funshoná óptimal. Nos Kreador ta e outoridat final tokante kondukta i fe di hende. Nos por haña Su stèndertnan i reglanan invariabel den Palabra di Dios. Pues, **ta Beibel ku ta determiná loke ta bon i loke ta malu**.

Ma ta keda na bo. Bo por obedesé Dios Su leinan; òf bo por rechasá nan. Ma méskos ku bo lo sufri e konsekuensianan penoso si bo ignorá e lei di gravidad i ta bula for di Willemstoren keriendo ku lo bo por zuef den laira...ta mes sigur ku bo lo yora lat ta malai si bo skohe pa violá Dios Su normanan i leinan di bon i malu.